


SANCTISSIMI DOMINI NOSTRI DOMINI

ALEXANDRI

DIVINA PROVIDENTIA

PAPÆ VII.

INNOVATIO CONSTITUTIONVM, ET DECRETORVM
 in favorem sententiæ afferentis, animam Beatæ Mariæ Virginis
 in sui creatione, & in corpus infusione á peccato
 originali præservatam fuisse,
 editorum.



ALEXANDER PAPA VII.

ad perpetuam rei memoriam.



SOLLICITVDO omnium Ecclesiarum, quam, licet meritis
 viribus longè impares, Dei Optimi Maximi voluntate, & pro-
 videntia gerimus, in id Nos anxie tenet intentos & vigilantes,
 vt scandala, quæ inter fideles pro humanæ naturæ corruptione
 & fragilitate necesse est vt veniât, quantum fieri potest, paucis-
 sima exoriantur, vtque exorta quàm celerrimè, & quàm dilige-
 tissimè amoveantur: nam ijs per quos veniunt certam peccati perniciem, qui-
 bus verò præbentur, præsens afferunt labendi periculum; quorum Nos pro nostro
 Pastoralis officij debito, & damnum summo opere dolemus, & discrimine assidue
 vrimur. Sanè, VETVS EST, Christi fidelium erga eius Beatissimam Matrem
 Virginem Mariam pietas, sentiendum, eius animam, IN PRIMO INSTAN-

TI

TI CREATIONIS, ATQVE INFUSIONIS IN CORPVS, fuisse speciali Dei gratia & priuilegio, intuitu meritorum Iesu Christi eius filij, humani generis Redemptoris, à macula peccati originalis PRÆSERVATAM IMMVNEM, atque IN HOC SENSU eius Conceptionis festiuitatem solemniter colentium, & celebrantium; creuitque horum numerus, atque huiusmodi cultus post editas à fel. rec. Sixto PP. IV. prædecessore nostro in eius commendationem Apostolicas Constitutiones, quas sacrum Concilium Tridentinum, innovauit, atque obseruari mandauit. Aucta rursus, & propagata fuit pietas hæc, & cultus erga Deiparam post erecta hoc nomine, approbantibus Romanis Pontificibus, religiosum Ordinem, & Confraternitates, ac concessas ab iisdem indulgentias, ita ut accedentibus quoque plerisque celebrioribus Academicis ad hanc sententiam, iam ferè omnes Catholici eam complectantur. Et quia ex occasione contrariæ assertionis in concionibus, lectionibus, conclusionibus, & actibus publicis, quod nempe eadem Beatissima Virgo Maria fuerit concepta cū peccato originali, oriebantur in populo Christiano eum magna Dei offensa scādala, iurgia, & dissensiones, rec. mem. Paulus PP. V. etiam prædecessor noster vetuit horum opinionem præfatæ sententiæ contrariam publicè doceri, aut prædicari. Quam prohibitionem pax mem. Gregorius PP. XV. similiter prædecessor noster, ad priuata etiam colloquia extendit, mandans insuper in fauorem eiusdem sententiæ, ut in sacrosancto Missæ sacrificio, ac diuino officio celebrandis tam publicè, quam priuatim, non alio quàm Conceptionis nomine uti quicumque debeant. Nihilominus, prout venerabiles fratres Episcopi ferè omnes Hispaniarum cum Ecclesiarum suarum Capitulis, datis ad Nos litteris exposuerunt: accedente etiam insinuatione CHARISSIMI IN CHRISTO FILIJ NOSTRI PHILIPPI EARVNDEM HISPANIARVM REGIS Catholici, qui specialem super hoc misit ad Nos Oatorem VENERABILEM FRATREM LVDOVICVM EPISCOPVM PLACENTINVM, per què etiam delatæ fuerunt ad Nos supplicationes Regnorum earundem Hispaniarum, pergunt aliqui contrariæ illius opinionis assertores contra præfatas prohibitiones tum priuatim, tum publicè præfatam sententiam, aut impugnare, aut bellicare, & fauorem à Romanis Pontificibus cultui, & festo secundum illam præstitum ita interpretari, ut frustentur, imò Ecclesiam Romanam huic sententiæ, & cultui iuxta illam Beatæ Virgini exhibito favere negant, pios Christi fideles è sua pacifica quasi possessione deturbare conando; unde offensiones, scādala, & iurgia, quibus obviare voluerunt Paulus V. & Gregorius XV. nostri prædecessores perdurant adhuc, & ex occasione eorundem adversantium maiora his incommoda in posterum prudenter, & merito timentur. Quapropter super his tam præfati Episcopi cum Ecclesiarum suarum Capitulis, quam memoratus Philippus Rex, eiusque Regna Nobis pro oportuno remedio instanter supplicari fecerunt. Nos considerantes quod Sancta Romana Ecclesia de intemeratæ, semperque Virginis Mariæ Conceptione festum solemniter celebrat, & speciale, ac proprium super hoc officium olim ordinavit iuxta piam, deuotam, & laudabilem institutionem, quæ à Sixto IV. prædecessore nostro tunc emanauit, volentesque laudabili huic pietati, ET DEVOTIONI, ET FESTO, AC CVLTVI SECVNDVM ILLAM EXHIBITO in Ecclesia Romana post ipsius cultus institutionem NVNQVAM IMMVTATO, Romanorum Pontificum prædecessorum nostrorum exemplo favere, necnon tueri pietatem & deuotionem, hanc colendi & celebrandi Beatissimam Virginem, PRÆVENIENTE SCILICET SPIRITVS SANCTI GRATIA, A PECCATO ORIGINALI PRÆSERVATAM; cupientesque in Christi grege vnitatem spiritus in vinculo pacis, sedatis offensionibus, & iurgiis, amotisque scādalis, conservare: ad præ-

præfatorum Episcoporum cum Ecclesiarum suarum Capitulis, ac Philippi Re-
 gis, eiusque Regnorum oblatam Nobis instantiam, ac preces, Constitutiones, &
 Decreta à Romanis Pontificibus predecessoribus nostris, & præcipuè à Sixto
 IV. Paulo V. & Gregorio XV. edita in fauorem sententiæ asserentis, animam
 Beatæ Mariæ Virginis IN SVI CREATIONE, ET IN CORPVS INFI-
 SIONE SPIRITVS SANCTI GRATIA DONATAM, ET A PECCA-
 TO ORIGINALI PRÆSERVATAM FVISSE, necnon & in fauorem festi,
 & cultus Conceptioni eiusdem Virginis Deiparæ SECVNDVM PIAM
 ISTAM SENTENTIAM, VT PRÆFERTVR, exhibiti, innouamus, & sub
 censuris, & pœnis in eisdem Constitutionibus contentis observari mandamus.
 Et insuper omnes, & singulos, qui præfatas Constitutiones, seu Decreta ita per-
 gent interpretari, vt favorem per illas DICTÆ SENTENTIÆ, ET FES-
 TO, SEV CVLTVI SECVNDVM ILLAM EXHIBITO frustrentur, vel
 qui hanc eandem sententiam, festum, seu cultum in disputationem revocare,
 aut contra ea quoquo modo directè, vel indirectè, aut sub quovis prætextu,
 etiam definibilitatis eius examinandæ, sive sacram Scripturam, aut Sanctos Pa-
 tres, sive Doctores glossandi, vel interpretandi, denique alio quovis prætextu,
 seu occasione, scripto, seu voce, loqui, concionari, tractare, disputare, contra ea
 quicquam determinando, aut asserendo, vel argumenta contra ea asserendo, &
 insoluta relinquendo, aut alio quovis excogitabili modo differendo, ausi fuerint,
 præter pœnas, & censuras in Constitutionibus Sixti IV. contentas, quibus illos
 subiacere volumus, & per præfentes subijcimus, etiam concionandi, publicè le-
 gendi, seu docendi, & interpretandi facultate, ac voce activa, & passiva in qui-
 buscumque electionibus eo ipso absque alia declaratione privatos esse volumus,
 necnon ad concionandum, publicè legendum, docendum, & interpretandum
 perpetuè inhabilitatis pœnas ipso facto incurrere absque alia declaratione, à
 quibus pœnis dispensari possint: necnon eosdem alijs pœnis nos-
 tro & eorumdem Romanorum Pontificum successorum nostrorum arbitrio in-
 fligendis pariter subiacere volumus, prout subijcimus per præfentes, innovan-
 tes Pauli V. & Gregorij XV. superius memoratas Constitutiones, sive Decre-
 ta. AC LIBROS, in quibus præfata sententia, festum, seu cultus secundum
 illam in dubium revocatur, aut contra ea quomodocumque, vt supra, aliquid
 scribitur, aut legitur, seu locutiones, conciones, tractatus, & disputationes con-
 tra eadem continentur, post Pauli V. supra laudatum Decretum edita, aut in
 posterum quomodolibet edenda, prohibemus, sub pœnis, & censuris in Indice
 librorum prohibitorum contentis, & ipso facto absque alia declaratione pro ex-
 pressè prohibitis haberi volumus, & mandamus. Vetamus autem Sixti IV. Cõs-
 titutionibus inhærentes, quempiam asserere, quòd propter hoc contrariam opi-
 nionem tenentes, videlicet gloriosam Virginem Mariam cum originali peccato
 fuisse conceptam, hæresis crimen, aut mortale peccatum incurrant, cum à Ro-
 mana Ecclesia, & Apostolica Sede nondum fuerit hoc decisum, pro vt Nos nunc
 minimè decidere volumus, aut intendimus: quin potiùs contrariam illam opi-
 nionem hæresis, aut peccati mortalis, aut impietatis damnare audentes, præter
 pœnas, quibus eos subiecit Sixtus IV. alijsque prædecessores nostri Romani Pon-
 tifices, gravioribus alijs pœnis subijcimus, quas in contrasacientes huic nostræ
 Constitutioni superius infliximus. Volentes, quod contra huius nostræ Consti-
 tutionis transgressores, etiam regulares cuiusvis Ordinis, & Instituti, ETIAM
 Societatis Jesu, & quomodolibet exemptos, & alias quascumque Ecclesiasticas,
 & seculares personas cuiuscumque status, gradus, ordinis, aut dignitatis tam
 Ecclesiasticæ, quàm secularis, vt præfertur, tam Episcopi, & Prælati superiores,
 alij

alijque locorum Ordinarij, quàm hæreticæ prauitatis vbique locorum deputati Inquisitores procedant, & inquirent, atque in eos strictè animadverrant: Nos enim ipsi, & eorum cuilibet contra eosdem transgressores procedendi, & inquirendi, ac pœnis coercendi, & puniendi liberam facultatem, & auctoritatem ipsidem auctoritate, & tenore tribuimus, & impartimur, eosque, vt præfertur, procedere, inquirere, & punire districtè præcipimus, & mandamus. Non obstantibus Constitutionibus, & Ordinationibus, ac quibusvis indultis, & literis Apostolicis quibusvis personis quantumcumque qualificatis, & in quacumque etiã Cardinalatus Patriarchali, Archiepiscopali, Episcopali, & quavis alia dignitate, & honore constitutis, etiam quod contra eos procedi, interdici, suspendi, vel excommunicari nequeat quomodolibet concessis. Quibus omnibus, & eorum singulis, etiam si pro sufficienti illorum derogatione de eis, ipsorumque totis tenoribus specialis, specifica, individua & expressa, ac de verbo ad verbum, non autem per generales, etiam id importantes clauulas, mentio habenda, aut alia exquisita forma observanda foret, tenores huiusmodi, ac si de verbo ad verbum inserti forent, præsentibus pro sufficienter expressis, & insertis habentes, harum serie specialiter, & expressè derogamus, cæterisque contrarijs quibuscumque. Vt autem hæc nostra Constitutio, & præmissa omnia ad eorum omnium, quorum interest notitiam congruentius pervenire possint, in virtute sanctæ obedientiæ, & sub pœna privationis ab ingressu Ecclesiæ eo ipso incurrenda præcipimus, & mandamus omnibus, & singulis locorum Ordinarijs, ac eorum Vicarijs, Suffraganeis, & Officialibus quibuscumque, & alijs singulis, ad quos quomodolibet spectat, & pertinet, quatenus huiusmodi nostram Constitutionem singulis suæ Diocesis, vel districtus prædicatoribus, & alijs, quibus expedire iudicaverint, oportunè insinuent, & publicent, ac insinuari, & publicari faciant, ne quis in posterum quoquo modo ignorantiam de præmissis possit prætere, aut se contra præmissa valeat excusare. ~~Voluerunt & similiter eadem Pontificatus decerni~~ præmissa, quod præsentis literæ per aliquos ex nostris Cursoribus in Basilicarum Sancti Ioannes Lateranensis, ac Principis Apostolorum, & Cancellariæ Apostolicæ valvis, ac in acie Campi Floræ de Vrbe de more publicentur, & affigantur, quæ affixio & publicatio ita omnes & singulos, ad quos spectet, afficiat, & arctet, ac si illis personaliter intimatæ fuissent, & quod illarum transumptis, etiam impressis, manu alicuius Notarij subscriptis, & sigillo alicuius personæ in dignitate Ecclesiastica constitutæ munitis, eadem prorsus fides adhibeatur, quæ præsentibus litteris adhiberetur si ostensæ, vel exhibitæ forent. Dat. Romæ apud Sanctam Mariam Maiorem sub annulo Piscatoris die viij. Decembris M. DC. LX. I. Pontificatus nostri anno septimo.

S. Vgolinus:

Anno millesimo sexcentesimo sexagesimo primo, Indictione 13. die vero 11. mensis Decembris, Pontificatus Sanctissimi in Christo Patris, & D. N. D. Alexandri Divina Providentia Papæ VII. anno septimo, superscriptæ literæ affixæ, & publicatæ fuerunt in Basilicarum S. Jo. Lateranensis, & Principis Apostolorum de Vrbe, ac Cancellariæ Apostolicæ valvis, & in acie Campi Floræ, vt moris est, per me Andream Castrucium prælibati Sanctiss. D. N. PP. Curf.
Pro D. Mag. Curf. Petrus Paulus Desiderius Curf.

ROMÆ, Ex Typographia Rev. Camere Apostolicæ
M. DC. LX. I.